

# Presentau in vast program da lavur

Emprema radunonza generala dalla Giuru egl agen local a Cuera

■ (anr/sm) La Gjuventetgna Rumantscha (GiuRu) ha presentau la sonda vargada il program pil proxim onn ed eligiu in niev cassier. A caschun dalla radunonza generala dalla Giuru ha la giuvna cantadura Chiara Jacomet cantau entginas canzuns da siu album «Mascras». Per la Giuru eisi stau l'emprema radunonza generala el niev local a Cuera. Allas anteriuras radunonzas ha la suprastanza mintgamai envidau ils commembers en ustrias pigl entir Grischun entuorn. Igl agen domicil sesanfla al Höhenbühlweg 4 davos l'ustria Zollhaus, visavi la Porta sura da Cuera. Dapi igl emprem da fevrer 2017 s'entaupa la suprastanza leu. Il president dalla Giuru Uolf Candrian ha beneventau in pign diember da commembers present ed ha presentau ils projects ed events digl onn vargau. 2016 ha la Gjuventetgna Rumantscha festivau 25 onns d'existenza, aschia hai dau plirs eveniments en quei connex. Il giubileum ha la Giuru festivau el tren denter Mustér e Chapella. Differents musicists han accumpignau l'uniun tras tut las tschun regiuns dalla Romantschia entochen agl Open Air Chapella. Dapi il giubileum ha la Giuru ina nova pagina d'internet.



La Giuru ha la salvau la radunonza generala egl agen local a Cuera.

FOTO S. MAISSEN

cassiera Alina Müller. Avon che daventar cassiera il 2015 ei Müller stada vicepresidente e presidenta dalla Giuru. Ella resta commembra dalla suprastanza. Enten surpender il niev post tscherca il giuven da Lucerna in contact pli stretg cul lungatg romontsch. Pertuccont las Vuschs Giuvnas fust la Giuru leda sch'ella retschevess dapli contribuziuns dalla giuventetgna romantscha. L'uniun vul per quei motiv bonificar vinavon mintga contribuziun cun 50 francs. «Nus lein aschia augmentar la motivaziun da separicipar a projects e mussar dapli preschientscha», ha il vicepresidente Maurus Bundi detg. Igl onn 2018 organischa la Gjuventetgna Rumantscha in seminari per l'organiziun YEN. Quella reit d'organiziuns da giuventetgna europaa ha la finamira da mantener e da sviluppar dretgs per minoritads. Il seminari cul num «Kick off» consista d'in di da sport d'unviern, seras culturalas e musica romantscha. Il liug dil seminari ei aunc buca fixaus.

## Mascras

Per la part culturala dalla sera ei la cantadura Chiara Jacomet stada responsabla. La giuvna da Rabiun ha cantau entginas canzuns digl album «Mascras». Igl emprem album dalla giuvna da 18 onns cumpara igl atun 2017. Chiara e sia band han duvrau la rampa da cagar sco tribuna. Il local dalla Giuru era pli baul in magasin dil Globus. L'entrada ei stada libra.

## Contact internaziunal

In ulteriur impurtont punct dallas activitads igl onn vargau ein ils contacts internaziunals stai. La suprastanza ha presentau plirs projects ed eveniments ch'els han elaborau cun autras minoritads eu-

ropeas. Dus commembers han presentau la cultura romantscha al project «Bisto International» el center da cultura a Winterthur. Dus commembers han visitau a Kärnten ina minoritad slovena ed il vicepresidente Maurus Bundi ha ac-

cumpignau duas equipas da ballapei all'Europeada el Tirolo dil sid. La Giuru ha era envidau autras minoritads en nosa regiun. Aschia han ils Fries, ina gruppa linguistica dalla Hollanda, visitau Maurus Bundi da Daniev. Il vicepresi-

dent ha mussau differents loghens dalla regiun.

## Midadas e projects

La suprastanza dalla Giuru ha nudau ina midada. Swen Gaberthüel rempiazza la

# Tgi ha la precedenza

Cuors da manischar dil TCS a Glion

■ (anr) Dapi l'avertura dil sviament a Glion regia in niev reschim da traffic el marcau. Quei caschuna a beinenqual automobilist rumpatesta. Il scolast d'ir cun auto Rolf Schindler da Sursaiusa ei sefatschentaus dacuort en in cuors purschius dalla gruppa regionala dil TCS a Glion cun ils problems dils automobilists avon ina cruschada ed el ha saviu slijar enqual nuv. Las gruppas regionalas dil TCS porschan dapi entgens onns ils cuors «Manischar actual – carreschel jeu aunc segir?». Hansjürg Frehner, il president dalla cumissiuon da cuors, ha elaborau il niev concept ed ei era staus presents a Glion, ensemen cun Armin Candinas, il president ad interim dalla secziun grischuna dil TCS. Il cuors «Manischar ac-

tual – carreschel jeu aunc segir?» sefatschenta cullas midadas el traffic succedidas ils davos onns e tegn aschia ils manischnunz sil niev stan. El cuors da treis uras s'informeschan ils participonts da novas prescripziuns da traffic, dil secuntener en ina rundella ed avon in passadi da pedunz, mo era da prescripziuns actualas dil carrar sill'autostrada. En ina part pratica accumpogna il scolast d'ir cun auto il singul participont en siu agen vehichel e cussegla quel.

Pil cuors a Glion ha Gion Petschen, il schef dalla gruppa regionala dil TCS Surselva, engaschau in capo scolast d'ir cun auto. Rolf Schindler ei vegnius eligius igl onn vargau il meglier scolast d'ir cun auto grischun.



Gabriela Cabalzar e Luis Defuns organischan il «Monthly Event».

FOTO S. MAISSEN

# Eveniments multifars per la giuventetgna

Inaga al meins ha il «Monthly Event» liug a Trun ella sala d'art

DA SILVAN MAISSEN / ANR

■ Il post da lavur da Gjuventetgna Cadi organischa comunablamein cun Luis Defuns, il possessur dalla sala d'art a Trun, mintga meins l'occurrenza «Monthly Event». La collaboraziun ei prevedida entochen la fin 2017. Ina prolungaziun dil project per l'uter onn ei pusseivla. La tierza ediziun ha liug ils 13 da matg. L'entschatta schaner ha il concert da batten dil disc cumpact «Undas» da Giganto alias Ivo Orlik e Mattiu Defuns & Band giu liug ella sala d'art a Trun. Quei ei stau il medem mument il project da pilot organisaus dalla Gjuventetgna Cadi e Luis Defuns. La collaboraziun dil possessur dalla sala d'art e dalla promotura dalla lavur da giuventetgna Gabriela Cabalzar ei naschida tier in discuors ella sala d'art. Tenor els eisi impurtont d'ademplier ils differents basegns dils giuvenils e da porscher la pusseivladad da

s'entupar. «Ils visitaders digl event duein buca mo consumar, mobein esser part digl eveniment» ha Cabalzar detg.

## Sesentir da casa

Oriundamein era il batten dil disc previus ella sala dalla scola da Trun. Cun quei ch'il batten dil disc cumpact ei vegnius stuschaus han ils organisateurs duvrau ina nova localitad. Pil possessur dalla sala d'art ei l'atgna bar stada il local ideal. «Nus levan ina localitad moderna ed ina atmosfera cultivada. Ins duess sesentir sco a casa», ha Luis Defuns detg. Il pictur artist da Trun organischa dapi diesch onns occurrenzas ella sala d'art. Dapi la stad vargada ei la bar aviarta il venderdis e la sonda per in e scadin.

## In onn d'emprova

Duas ediziuns «Monthly Event» han gia giu liug. All'emprema ediziun l'entschatta mars ha «Wolfonics» animau ils visita-

ders cun musica electronica. Ulteriur han ils organisateurs presentau il project al publicum e mintgin ha silsunter saviu separicipar ad in questiuonari. Il resultat dil questiuonari ha tenor Cabalzar mussau ch'els giuvenis giavischan eveniments en ambient emperneivel. Atgnas ideas seigen denton stadas scartas, ha la promotura manegiau. Alla secunda ediziun igl avrel ha la Gjuventetgna Cadi organisau in turnier da pitgar en guotas. La sera ei stada frequentada bein. La mischeida da vegliadetgna ha denton buca cuntentau. Il proxim «Monthly Event» ha liug ils 13 da matg cul DJ Devois alias Flavio Deflorin sco punct culminont. Naven dil fenadur entochen il settember dat ei neginas occurrenzas. Il program cuntinuevha igl october cun in concert dalla cantadura Chiara Jacomet. Ils organisateurs fan la cuntinuaziun da «Monthly Event» in auter onn dependent digl interess pils eveniments.



Il scolast d'ir cun auto Rolf Schindler ha menau dacuort a Glion il cuors «Manischar actual – carreschel jeu aunc segir?» purschius dil TCS.

FOTO G. VENZIN